

## Kadasi ciciri su bo YOHANE akere i ni

### *Nɔanie n bo i ma ngɔɔ n dɛɛ jɔɛ*

<sup>1</sup> Ya sukere ma am fa kɔ nɔanie n bo i ma ngɔɔ n su wɔ. Kana Nyeme ba yi durunya n ni, nyini nɔanie n bo i ma ngɔɔ n woori bere wɔ. Deke bo ya ti i, na ya nyumbaa aɲu i, na ya nie aɲu i kabo i ti barasu, na ya fa ya saa akan i, ye ya sukere fa ma am n a. <sup>2</sup> Nyini nɔanie n la Yesu bo i ma ngɔɔ ni, i yo fiteeri fofoe nu wɔ, na ya nyumbaa aɲu i, nyini ti ye ya di ngɔɔ n bo i la má awieeri n daani kan i kere am n a. Yiri bo i ma ngɔɔ n bo i la má awieeri n yo woori i Si Nyeme dɔ ɔ, ye wɔ yi i ɲu akere ya a. <sup>3</sup> Deke n bo ya ɲu i, na ya ti i ni, ye ya sukan i kere am n a, adena ya ni ambere la wo fie ni ya beɲgu, na ya kere la wo fie ni ya Si Nyeme ni i Wa Yesu Kristo ni. <sup>4</sup> Deke n bo i ti na ya sukere ahin dekem ma am n la ka, adena ya nya ahorejo nahore su.

### *Kabo i ti ye ni ka ya bita wein atin ni*

<sup>5</sup> Ahin labari n bo ya yo tiiri i Nyeme Wa n dɔ n lee, ye ya sukan kere am n a, ka Nyeme ti wein wɔ, na awosin haari kaan sɔ wo má i dɔ. <sup>6</sup> Nzen ya ɲa ya ni yiri la wo fie ni ya beɲgu, ama, na ya toko wo awosin nu yo satie, ya ti kɔrefom wɔ lee, ya bita má nahore. <sup>7</sup> Ama, nzen ya bita wein atin kabo yiri Nyeme atin n ti wein ni, ya ni yiri la wo fie ni ya beɲgu lee, na i Wa Yesu

mbunja ni kpakpara yi ya satie kere bo i wo ya nu ni. Nyini ti, am ma ya bita wein n atin ni.

<sup>8</sup> Nzen ya na ya ti má satieyofom, ya dadaka ya nu wo lee, na nahore wo má ya ahore su. <sup>9</sup> Ama, nzen ya kan ya satie kereeri Nyeme, i fá ya satie n ce ya a, na i kpakpara yi ya fite ya sa kere bo i ko má atin su nu, dama i la dabunu, na i yo sa bo i ko atin n su. Nyini ti, am ma ya kan ya satie kere kere Nyeme. <sup>10</sup> Nzen ya na ya yo má satie, ya yi Nyeme korefo lee, na i noanie n wo má ya ahore su lee.

## 2

### *Yesu Kristo ti ya bukafɔ a*

<sup>1</sup> M nbaam, m koro má ka am yo satie, nyini dee ti ye m sukere ahin jore n ma am n a, ama, nzen am be yoori satie, ya la sono be bo i yo ya ni ya Si Nyeme afien dongu, yiri la Yesu Kristo bo i yo sa bo i ko atin su sanja kere ni. <sup>2</sup> Ya satie ti, na yiri Yesu ade ya jinaabiri, na wo fa i nu ayo tie afa ama Nyeme, adena Nyeme fá ya satie ce ya, má yere ngumi dee satie, ama, durunya n nufom kere dee satie.

<sup>3</sup> Am ma ya de Nyeme noanie maawam ni, nyini kere ka ya si yiri Nyeme lee. <sup>4</sup> Sono kere bo i na, i si Nyeme, na i de má i noanie maawam ni, i mi ti korefo o, na nahore wo má i ahore su. <sup>5-6</sup> Ama, sono kere bo i deeru Nyeme noanie ni, i mi ti sono bo i koro Nyeme nahore su a. Na sono kere bo i na i wo ni Nyeme, wo yo daka ka i mi wo kabo Yesu wo ti ni. Nyini ye ya fa si ka ya wo ni Nyeme a.

7 M ninbaa koroowam, má nɔaniɛ maawa fɔfɔrɛ ye m sukɛrɛ ma am n a, ama, nɔaniɛ maawa dawa n bo am du mɔ tiiri i n a. Nyini nɔaniɛ maawa dawa n la jɔrɛ n bo am yo tiiri i sangɔ bo am boori i bu suuri Yesu su ni. 8 Tɔ, ama, nɔaniɛ maawa n bo m sukɛrɛ ma am ni, i kaaki ti nɔaniɛ maawa fɔfɔrɛ wɔ bekun, na ya ŋu ka i ti nahɔrɛ wɔ, fite kabo Yesu Kristo wo ti ni, ni kabo am wo ti ni, dama awosin n susin, ye wein nahɔrɛ su wo ta su.

9 Sɔnɔ kɛrɛ bo i ŋa i wo wein n nu, na i kpɔ i niwa, i mi toko wo awosin nu wɔ lɛɛ. 10 Sɔnɔ kɛrɛ bo i koro i niwa wo wein n nu wɔ, i yo má sa be bo i ma i niwa bo i jaa kpaasi. 11 Sɔnɔ kɛrɛ bo i kpɔ i niwa, i mi wo awosin nu wɔ, na i suyo satiem, dama awosin n ata i nyi, nyini ti, ye i si má dekem bo i yo bu n a.

*Sɔnɔ bo i ŋa i si Nyemɛ, i ti má ye ni ka i koro durunya ni*

12 M nbaam, deke bo i ti na m sukɛrɛ ahin kadasi n ma am n la ka,  
Nyemɛ afa am satie ace am, Yesu Kristo dɛɛ ti.

13 Sim, deke bo i ti na m sukɛrɛ ma ambɛrɛ n la ka,  
am si Yesu,  
yiri bo i wo bɛrɛ kana Nyemɛ ba yiiri durunya n kɛrɛ ni.

Ngbefɛnɛm, deke bo i ti na m sukɛrɛ ma ambɛrɛ n la ka,  
am akunma Sitana n dɛɛ ti.

14 M nbaam, deke bo i ti na m toko kɛrɛ ma am n la ka,

am si ya Si Nyeme n dɛɛ ti.  
 Sim, deke bo i ti na m toko kɛrɛ ma am n la ka,  
 am si Yesu bo i wo bɛrɛ durunya n bumboori  
 n kɛrɛ ti.  
 Ngbɛfɛnɛm, deke bo i ti na m toko kɛrɛ ma am n  
 la ka,  
 am yarada n ti faŋga,  
 na Nyeme noaniɛ n wo am ahore su,  
 na am akunma Sitana n dɛɛ ti.

<sup>15</sup> Tɔ, má am koro durunya n ni, ni deke n kɛrɛ  
 bo bu wo nu ni. Sɔnɔ kɛrɛ bo i koro durunya ni,  
 i mi koro má ya Si Nyeme lɛɛ. <sup>16</sup> Dama deke n  
 kɛrɛ bo i wo durunya n nu fɛn na i wura sɔnɔ  
 konvi, ni deke bo sɔnɔ nyumbaa ŋu i na i koro i,  
 ni deke bo sɔnɔ nya i na i fa fɔ, i fite má ya Si  
 Nyeme dɔ, ama, i kɛrɛ fite durunya n nu fɛn wɔ.  
<sup>17</sup> Durunya n ni deke kɛrɛ bo i wura mine konvi  
 kɛrɛ la awieeri, ama, sɔnɔ kɛrɛ bo i yo Nyeme sa  
 koroowa, i nyá ŋgɔɔ bo i la má awieeri.

*Kabo ya si ya ŋu sa ni Kristo kpɔfɔ n ni*

<sup>18</sup> M nbaam, durunya ni sukɔ awieeri lɛɛ. Am  
 yo tiiri ka nzen durunya n ba sukɔ awieeri, Kristo  
 kpɔfɔ ni bá, ama, kisa Kristo kpɔfɔm dɔŋgu ayi  
 bu ŋu fofoe nu. Nyini ti, ya si ka durunya ni sukɔ  
 awieeri lɛɛ. <sup>19</sup> Nyini minɛm n bo bu ti Kristo  
 kpɔfɔm na ba fite ya nu ni, nahɔrɛ su, bu ti má  
 ya minɛm. Nzen má bu ti ya minɛm, má bu ka  
 ya dɔ ɔ. Ama, ba fite ya nu, nyini ye ya si ka, bu  
 be mmɔɔ ti má ya minɛm a.

<sup>20</sup> Ama, ambɛrɛ yiri, Kristo n afa i Awiewie Casi  
 n awura am ahore su, na am si deke bo i ti nahɔrɛ  
 ni. <sup>21</sup> Má ka am si má nahɔrɛ n dɛɛ ti, ye m sukɛrɛ  
 ma am n a, ama, am si i, na am si ka kɔrɛ koro

yo má nahòrɛ. <sup>22</sup> Nma ti kòrɛfɔm kɛrɛ tii n a? Kòrɛfɔ n la sɔnɔ kɛrɛ bo i nja Yesu ti má Kristo Tiidefɔ n bo Nyɛmɛ sunmaari i ni, yiri n bo i yo sɔ n akete ya Si Nyɛmɛ, ni i Wa n lɛɛ, i mi ni ti Kristo kpɔfɔ n a. <sup>23</sup> Dama sɔnɔ kɛrɛ bo i keteeri Nyɛmɛ Wa ni, akete i Si Nyɛmɛ mmɔɔ lɛɛ. Ama, sɔnɔ kɛrɛ bo i nja Kristo ti Nyɛmɛ Wa ni, i mi n ade i Si Nyɛmɛ mmɔɔ lɛɛ. <sup>24</sup> Nyini ti, nɔaniɛ n bo am tiiri i saŋga bo am boori i bu suuri Kristo su ni, am ma i wo am ahore su. Nzen am bita nyini nɔaniɛ ni am ahore su, nyini ma am ni Nyɛmɛ Wa ni, ni i Si n yo deke kun a. <sup>25</sup> Deke bo Kristo seeri ka i fá ma ya n la nɔɔ bo i la má awieeri ni.

<sup>26</sup> M sukere ahin nɔaniɛ n ma am, na am si am nju sa fa kɔ minɛm bo bu koro ka bu dadaka am ni. <sup>27</sup> Ama, amberɛ yiri, Awiewie Casi n bo Kristo afa ama am wo am dɔ. Nyini ti, i ti má ye ni ka be fa kereewa be kere am kun, dama Awiewie Casi ni kere am deke kɛrɛ a, na deke kɛrɛ bo i kere am ti nahòrɛ wɔ, kɔrɛ wo má nu. Nyini dɛɛ ti, am wo ni Kristo kabo Awiewie Casi n akere am ni.

<sup>28</sup> M nbaam, kisa am wo ni Kristo, na cɛɛn n bo i ba yiiri i nju fiteeri fofoe nu n na ya la ahoresi, na má nyinse ti ya. <sup>29</sup> Am si ka Yesu yo sa bo i kɔ atin n su, nyini ti, am si ka sɔnɔ kɛrɛ bo i yo sa bo i kɔ atin n su, i ti Nyɛmɛ wa a.

### 3

#### *Bo bu ti Nyɛmɛ nbaam ni*

<sup>1</sup> Am niɛ koro bo ya Si Nyɛmɛ fa koro ya barasu a. Nyini dɛɛ ti, ye i fere ya ka i nbaam

n a, i ti nahore ka ya ti i nbaam wo. Durunya n nufom si má ya Si Nyeme, nyini dee ti, ye bu si má ka ya ti i nbaam n a. <sup>2</sup> M ninbaa koroowam, kisa ya ti Nyeme nbaam wo, na Nyeme nya yi kere má ya kabo ya bá ti barasu, ama, ya si ka Yesu bá baari, ya tí kabo i ti n wo, dama ya nju i kabo i ti barasu. <sup>3</sup> Nyini ti, sono kere bo i la tama ka i bá yo kabo Yesu ti ni, i bita i nju casi, kabo Yesu ti casi ni.

<sup>4</sup> Sono kere bo i yo satie, i mi ti Nyeme noanie kpamaawa n ketefo o, dama satieyo ti Nyeme noanie kpamaawa n kete wo. <sup>5</sup> Am si ka Yesu baari durunya n nu, ka i ba yi satie bo i wo ya nju n wo, ama, yiri ni i tii la má satie be. <sup>6</sup> Nyini ti, sono kere bo i wo ni Yesu, koro suyo má satie, ama, sono kere bo i toko yo satie, nyini kere ka, wo nya nju má i lee, na i mi kaaki si má i.

<sup>7</sup> M nbaam, má am ma be dadaka am. Sono kere bo i yo sakpa, Nyeme de i ka i mi yo sa bo i ko atin su i do, kabo Yesu ti ni. <sup>8</sup> Sono kere bo i yo satie, i mi ti Sitana dee sono o, dama fite durunya n bumboori n kere ye Sitana n yoori satie a. Deke bo i ti na Nyeme Wa n baari durunya n nu la ka, i ba yo Sitana n juma ngbeen wo. <sup>9</sup> Sono kere bo i ti Nyeme wa koro suyo má satie, dama Nyeme woowa n wo i mi do, na Nyeme ti i Si n dee ti, i koro suyo má satie. <sup>10</sup> Deke bo ya fa si minem bo bu ti Nyeme nbaam, ni bo bu ti Sitana n nbaam n la ka, sono kere bo i yo má sakpa, wara sono kere bo i koro má i niwa, i mi ti má Nyeme wa.

*Kabo ya koro ya bengu barasu ni*

11 Jore n bo am tiiri i sangá bo am boori i bu suuri Yesu su n la ka, am ma ya koro ya bengum. 12 Má am ma ya yo ka Keen, bo i yo ti Sitana dɛɛ wa ni, na i kuunri i niema ni. Nzu ti ye i kuunri i niema n a? I sayoowa ti má kpa n dɛɛ ti, na i niema n dɛɛ n ti kpa n ti. 13 Nyini ti, m ninbaam, nzen durunya n nufom kpɔ am ka am yo sakpa n dɛɛ ti, má am ma i yo am alekutura. 14 Kabo yere koro ya ninbaam n ti, nyini ma ya si ka ya fite yiwee n nu anya ngɔɔ nahɔre su a. Sɔnɔ kere bo i koro má i niwa toko wo yiwee nu wo lɛɛ. 15 Sɔnɔ kere bo i kpɔ i niwa ti sɔnɔ kunfo ɔ Nyeme do. Am si ka sɔnɔ kere bo i kun sɔnɔ la má ngɔɔ bo i la má awieeri ni. 16 Yesu deerɛ ya dɛɛ jinaabiri wo, na wo to i ngɔɔ awu ama ya, nyini ma ya fa si kabo koro ti barasu a. Nyini ti, wo yo daka ka ya gusu to ya ngɔɔ ma ya ninbaam, haari nzen i yo yiwee mmɔɔ. 17 Sɔnɔ kere bo i la nenje, na i ŋu ka i niwa wo yaari nu, na i si má i anjunfo ka i buka i, Nyeme koro wo má i mi n ahore su lɛɛ. 18 M nbaam, má am ma ya jɔjɔowa n ngumi kere ka ya la koro, ama, am ma ya sayoowa kere ka ya koro ya ninbaam nahɔre su. 19 Nyini ma ya fa si ka ya su nahɔre n su a, na i ma ya la ahoresi Nyeme do a, 20 na nzen ya sunsunni maari ya ka ya yo satie, ya si ka Nyeme tara ya sunsunni ni, na i kaaki si deke n kere. 21 Nyini ti, m ninbaa koroowam, nzen ya sunsunni ase má ya ka ya yo satie, ya la ahoresi Nyeme do lɛɛ. 22 Na deke kere bo ya sereeri i, ya nya i wo, dama ya de noanie maawa n bo Nyeme fa maari ya ni, na ya yo sa bo i sun i nu. 23 Noanie maawa n bo Nyeme fa maari

ya n la ka, ya yo i Wa Yesu Kristo yarada, na ya koro ya ninbaam ni, kabo wɔ se ya ni. <sup>24</sup> Sɔnɔ kɛrɛ bo i deerɪ Nyɛmɛ nɔaniɛ maawam n wo ni Nyɛmɛ, na Nyɛmɛ mmɔɔ wo ni i mi ni. Awɛwɛ Casi n bo wɔ fa ama ya ni, ma ya si ka Nyɛmɛ wo ni yɛrɛ a.

## 4

### *Awɛwɛ n bo i ti nahɔrɛ ni bo i ti kɔrɛ n jɔrɛ*

<sup>1</sup> M ninbaa koroowam, má am yo minɛm kɛrɛ bo bu ɲa Nyɛmɛ Awɛwɛ n wo bu dɔ n yarada, ama, am yo bu na am niɛ ka bu kereewa n fite Awɛwɛ Casi n dɔ, nzen i fite má. Dama kɔrɛfɔm dɔŋgu bo bu yo bu ɲu ka bu ti Nyɛmɛ nɔaniɛ kanfɔm n asandi abara ayɛ durunya n nu. <sup>2</sup> Nyɛmɛ nɔaniɛ kanfɔ kɛrɛ bo i se ka Yesu Kristo kaakiiri adamande baari durunya n nu fɛn, yiri ye Nyɛmɛ Awɛwɛ n wo i dɔ a. Nyini ye am fa si bo Awɛwɛ Casi n wo bu dɔ, ni bo i wo má bu dɔ a. <sup>3</sup> Ama, sɔnɔ kɛrɛ bo i keteeri ka, Yesu akaaki má adamande ni, Nyɛmɛ Awɛwɛ n wo má i mi dɔ, ama, i dɛɛ kereewa n fite Kristo kpɔfɔ n dɔ ɔ. Yiri ye am yo tiiri ka i bá durunya n nu, ye kisa wɔ ba n a.

<sup>4</sup> M nbaam, am ti Nyɛmɛ dɛɛ minɛm wɔ, ye am akunma nyini kɔrɛfɔm bo bu yo bu ɲu ka bu ti Nyɛmɛ nɔaniɛ n kanfɔm ni, dama Awɛwɛ Casi n bo i wo am nu n la yiko tara Sitana n bo i wo durunya n nufɔm nu ni. <sup>5</sup> Nyini kɔrɛfɔm bo bu yo bu ɲu ka bu ti Nyɛmɛ nɔaniɛ kanfɔm ni, bu kan durunya n nu jɔrɛ kere minɛm a, na durunya n nufɔm de kabo bu kere ni, dama bu



ti durunya n nufom wɔ. <sup>6</sup> Ama, yere yiri, ya ti Nyeme dee minem wɔ, sɔnɔ kere bo i si Nyeme de kabo ya kere n wɔ, ama, sɔnɔ kere bo i ti má Nyeme dee de má kabo ya kere ni. Nyini ye ya fa si minem bo bu la Nyeme Awiewie n bo i kere nahore n a, ni bo bu bu kore n fite Sitana do n a.

*Ya koro ya bengu kabo Nyeme koro ya ni*

<sup>7</sup> M ninbaa koroowam, am ma ya koro ya niwa, dama koro fite Nyeme do, na sɔnɔ kere bo i koro i bengu ti Nyeme wa a, na i mi si Nyeme a. <sup>8</sup> Nyeme ti koro wɔ, nyini ti, sɔnɔ kere bo i koro má i bengu si má Nyeme. <sup>9</sup> Kabo Nyeme kereeri i koro fa ko ya do n la ka o, wɔ sunma i kunnu Wa kun n kpein durunya n nu, adena yiri dee ti na ya nya ngoo. <sup>10</sup> Kabo koro ti lee, má ka yere koroori Nyeme a, ama, yiri koroori ya a, na wɔ sunma i Wa, na wɔ de ya jinaabiri na wɔ fa i nu ayo tie afa ama Nyeme, adena Nyeme fa ya satie ce ya. <sup>11</sup> M ninbaa koroowam, kabo Nyeme koro ya so ni, wɔ yo daka ka ya gusu koro ya bengu. <sup>12</sup> Be nya nu má Nyeme, ama, nzen ya koroori ya bengu, Nyeme wo ya do lee, na nyini ma i dee koro n wo ya do na i ti kabo i koro ka i ti n a.

<sup>13</sup> Awiewie Casi n bo Nyeme afa ama ya ni, nyini ma ya si ka ya wo ni yiri a, na i gusu wo ni yere a. <sup>14</sup> Na yere anu kabo ya Si Nyeme n asunma i Wa n ka i ba yo durunya n nufom Tiidefo, ye ya di i daani a. <sup>15</sup> Sɔnɔ kere bo i tekeeri i noo seeri ka Yesu ti Nyeme Wa, Nyeme wo i mi n do, na i mi n gusu wo ni Nyeme lee. <sup>16</sup> Yere mmoo ni ya tii si kabo Nyeme koro ya barasu, ye ya yo yarada ka i koro ya.

Nyeme ti koro wo, nyini dee ti, sono kere bo i koro i benggu ni, i mi wo ni Nyeme, na Nyeme wo ni yiri. <sup>17</sup> Nyeme koro wo ya do, i ti kabo i koro ka i ti n wo, nyini ti ye ya ba koro jina i nyunu ni ahoresi, ceen n bo Nyeme ba di durunya n nufom kere jore ni, ma pui ti, kabo Kristo ti ni, ya gusu wo ti so o, durunya n nu. <sup>18</sup> Sono kere bo Nyeme koro wo i do soro ma sere, dama koro bo i ti kabo Nyeme koro ka i ti ni, i fon yi sere wo, nyini ti, sono kere bo i soro sere, Nyeme koro wo ma i do kabo ma Nyeme koro ka i ti ni, dama sere ni suicin nati a. <sup>19</sup> Nyeme du mo koroori ya, nyini dee ti ye ya gusu la koro n a. <sup>20</sup> Sono kere bo i na i koro Nyeme, na i koro ma i ninbaam ni, i mi ti korefo o. Nzen i koro ma i niwa bo i nyumbaa nu i ni, i yo se koro Nyeme bo i nyumbaa nu ma i n a? <sup>21</sup> Nkanie maawa n bo Yesu afa ama ya n la ka, sono kere bo i koro Nyeme, wo yo daka ka i mi koro i ninbaam gusu.

## 5

### *Kabo ya kunma durunya n ni*

<sup>1</sup> Sono kere bo i yo yarada ka Yesu ti Kristo Tiidefo n bo Nyeme asunma i ni, i mi ti Nyeme wa a, na sono kere bo i koroori baa n wufo ni, i koro baa n gusu. <sup>2</sup> Deke bo ya fa si ka ya koro minem bo bu ti Nyeme nbaam n la ka, ya koro Nyeme, na ya de nkanie maawam n bo wo fa ama ya ni. <sup>3</sup> Nzen ya deeru Nyeme nkanie maawam ni, nyini kere ka ya koro i a. I nkanie maawam n gusu ti ma kekereke, <sup>4</sup> dama sono kere bo i ti Nyeme wa kunma durunya n wo. Deke bo ya

fa kunma durunya n la kabo ya yo Yesu yarada n wɔ. <sup>5</sup> Nma koro kunma durunya n a? Bo i koro kunma durunya n la sɔnɔ bo wɔ yo yarada ka Yesu ti Nyemɛ Wa ni.

*Daani diiwa fa kɔ kabo Yesu Kristo ti Nyemɛ Wa ni*

<sup>6</sup> Yiri Yesu Kristo yo baari durunya n nu n a, na ba biɛ i Nyemɛ nzue, nyini sin, na wɔ ba awu, na i mbunja afite agɔ. I baari ni, má ka bu biɛeri i Nyemɛ nzue n ngumi wɔ, ama, i wuuri wɔ, na i mbunja afite agɔ. Awiewiɛ Casi ni di i daani a, dama Awiewiɛ Casi n ti nahɔrefɔ ɔ. <sup>7</sup> Deke nsan di i daani a. <sup>8</sup> Bu daani diiwa n ti kun wɔ. Bɛrɛ la Awiewiɛ Casi ni, ni kabo bu biɛeri i Nyemɛ nzue ni, ni kabo i wuuri na i mbunja fite gɔɔri ni. <sup>9</sup> Sɔ ye Nyemɛ ni i tii adi i tienɔgu Wa n daani a. Ya de minem daani diiwa, nyini ti, i ti ye ni ka ya de Nyemɛ daani diiwa, dama i daani diiwa n la fanɔga tara minem dɛɛ. <sup>10</sup> Nyini ti, sɔnɔ kɛrɛ bo i yoori Nyemɛ Wa n yarada, i mi la daani difɔ, yiri la Awiewiɛ Casi n bo i wo i ahore su ni, na sɔnɔ kɛrɛ bo wɔ yo má i yarada ayi Nyemɛ kɔrefɔ lɛɛ, dama wɔ yo má daani n bo Nyemɛ adi i fa kɔ i Wa n su yarada. <sup>11</sup> Nyemɛ daani diiwa n la ka o, wɔ ma ya ngɔɔ n bo i la má awieeri ni, nyini ngɔɔ n wo i Wa n dɔ ɔ. <sup>12</sup> Sɔnɔ kɛrɛ bo i ni Nyemɛ Wa n ayo kun, i mi la nyini ngɔɔ ni, na sɔnɔ kɛrɛ bo i de má Nyemɛ Wa ni, i la má ngɔɔ.

*Ngɔɔ bo i la má awieeri n jɔrɛ*

<sup>13</sup> M koro ka amɛrɛ bo am ayo Nyemɛ Wa n yarada n si ka am la ngɔɔ bo i la má awieeri ni, nyini dɛɛ ti ye ma kɛrɛ ahin kadasi n ama am

n a. <sup>14</sup> Ya la ahoresi ni Nyeme, ka, deke kere bo ya sereeri i, na i ti i de koroowa, i de ya sere wo. <sup>15</sup> Ya si ka deke kere bo ya sereeri i, na i de ya sere, ya si ka wo yo i ama ya lee.

<sup>16</sup> Nyini ti, nzen sonu nu ka i niwa be ayo satie be bo i kpaaki ma i ni Nyeme afien fieo, i mi sere Nyeme ma yiri n bo wo yo satie ni, na Nyeme ma i ngoo. Ama, satie be wo bere bo i kpaaki sonu ni Nyeme afien fieo, m suse ma ka am sere Nyeme ma minem bo bu yo nyini satie n wo. <sup>17</sup> Sa kere bo minem yo i na i ti ma kpa ti satie wo Nyeme do, ama, satieyo nbem wo bere bo i kpaaki ma sonu ni Nyeme afien fieo.

<sup>18</sup> Ya si ka minem kere bo bu ti Nyeme nbaam koro suyo ma satie, dama Nyeme Wa ni nminda i a, na Sitana koro yo ma i mi pui. <sup>19</sup> Ya si ka durunya n nufom kere wo Sitana n saa nu wo, ama, yere ti Nyeme deem wo. <sup>20</sup> Ye ya kaaki si ka Nyeme Wa n aba na wo ba ateke ya nyi wo, adena ya si yiri n bo i ti Nyeme nahore su ni. Ye ya wo ni Nyeme n bo i ti nahore n ni i wa Yesu Kristo ni. Yiri ti Nyeme nahore su n a, na i ma ngoo bo i la ma awieeri n a.

<sup>21</sup> To, m nbaam, am tara am nu, na ma am su amoem.

**ΝΥΣΜΕ ΙΟΡΕ ΚΑΔΑΣΙ**  
**The New Testament in Anufo (Chokosi)**

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022

fe36d0e6-2a60-5e15-8d1c-8bf275389598